

23/11/2001

Penghormatan terakhir rakyat

Zulkofli Jamaludin; Wan Esuriyanti; Wan Ahmad; Junita Mat Rasid
KUALA LUMPUR, Khamis - Ribuan rakyat pelbagai peringkat mengunjungi Istana Negara sejak pagi, bagi memberikan penghormatan terakhir kepada jenazah Yang di-Pertuan Agong, Almarhum Sultan Salahuddin Abdul Aziz Shah Ibni Almarhum Sultan Hisamuddin Alam Shah.

Hujan gerimis dan cuaca mendung seperti meratapi pemergian Almarhum yang terkenal dengan sifat kesederhanaan dan berjiwa rakyat, tidak menghalang rakyat membanjiri istana.

Jenazah Almarhum disembahyangkan di Masjid Negara dengan diimamkan Mufti Wilayah Persekutuan, Datuk Hashim Yahya pada jam 8.20 pagi ini sejurus tiba dari Istana Selangor kira-kira jam 8 pagi.

Turut serta bersembahyang ialah Timbalan Yang di-Pertuan Agong Sultan Mizan Zainal Abidin, Pemangku Raja Selangor Raja Idris Shah; Perdana Menteri, Datuk Seri Dr Mahathir Mohamad; Timbalan Perdana Menteri, Datuk Seri Abdullah Ahmad Badawi, menteri Kabinet dan orang ramai.

Di Istana Negara, jenazah Almarhum diletakkan di persada khas tujuh tingkat yang ditutup kain kuning, dengan pegawai tentera darat, udara dan laut serta polis berkawal di keempat-empat penjuru.

Darjah dan bintang kebesaran Almarhum disusun di sekeliling persada yang dibina di tengah Balairung Seri istana itu.

Bacaan ayat suci al-Quran berkumandang di ruang itu ketika kerabat diraja, orang kenamaan dari dalam dan luar negara serta orang ramai memberikan penghormatan terakhir kepada Almarhum.

Raja Permaisuri Agong, Tuanku Hajah Siti Aishah, Sultan Sharafuddin Idris Shah dan kerabat diraja Selangor mendahului acara memberi penghormatan terakhir itu.

Raja Permaisuri Agong kelihatan mengesat air matanya sepanjang majlis, membayangkan kesedihannya dengan kehilangan Seri Paduka yang mengahwininya pada 1990.

Jenazah Almarhum kemudian diusung dari Istana Negara menggunakan pedati diraja ke Dataran Merdeka.

Di dataran itu, pedati yang ditarik 12 anggota ketiga-tiga cabang Angkatan Tentera Malaysia (ATM), tiba di hadapan bangunan Sultan Abdul Samad jam 12.45 tengah hari.

Jenazah diberi penghormatan penuh ketenteraan dalam satu istiadat perbarisan kehormat terdiri 112 anggota dan lapan pegawai Batalion 1, Regimen Askar Melayu Diraja diketuai Mejar Hamdan Musa.

Yang di-Pertuan Agong ialah panglima tertinggi Angkatan Tentera Malaysia (ATM).

Kira-kira jam 1.10 tengah hari, jenazah diangkat dari pedati diraja dan diusung 12 anggota ke dalam kenderaan jenazah diraja untuk dibawa ke Istana Alam Shah.

Lagu Negaraku dimainkan oleh pancaragam ATM sebelum kenderaan jenazah bergerak meninggalkan dataran itu menuju ke Klang.

Beribu-ribu rakyat berkumpul di Dataran Merdeka seawal jam 9 pagi selain sepanjang jalan raya yang dilalui kenderaan jenazah diraja untuk memberi penghormatan terakhir kepada raja berjiwa rakyat itu.

(END)